



JORNAL

do

Parlamento Nacional

V LEGISLATURA

3.ª SESSÃO LEGISLATIVA (2020-2021)

REUNIÃO PLENÁRIA DE 25 DE JANEIRO DE 2021

Presidente: Ex.^{mo} Sr. Aniceto Longuinhos Guterres Lopes

Vice-Presidentes: Ex.^{mos} Srs. Maria Angelina Lopes Sarmiento e
Luís Roberto da Silva

Secretária: Ex.^{ma} Sr.^a Lídia Norberta dos Santos Martins

Vice-Secretários: Ex.^{mos} Sr.^a Regina Freitas e
Sr. António Maria Nobre Amaral Tilman

SUMÁRIO

Sr. Presidente loka sessão plenária iha tuku 09 liu minuto 49 dadeer.

Antes Ordem do Dia — Aprovação voto de pesar ba falecimento Sr. Deputado Sabino Soares «GUNTUR».

Ordem do Dia — Sessão Solene hodi fó homenagem ba Memória Saudoso Deputado Sabino Soares «GUNTUR».

Sessão solene nia processo hanessan tuirmai:

Iha tuku 10 liu minuto 25 dadeer, procissão ho urna Sr. Sabino Soares «GUNTUR» nian, ne'ebé dudu hussi membro unidade polícia Batalhão de Ordem Pública (BOP) no acompanha hussi faluk, oan-kiak no família tomak, ne'ebé acompanha mós hussi Secretário-Geral (Sr. Adelino Afonso de Jesus) no Adjunto Secretário-Geral (Sr. João Rui),

tama iha Sala Plenário enquanto música instrumental «Il Silenzio» toca.

Iha Plenário laran hein ona hussi Presidente do Parlamento Nacional (Sr. Aniceto Longuinhos Guterres Lopes), Vice-Presidente sira (Sr.^a Maria Angelina Lopes Sarmiento no Sr. Luís Roberto da Silva), Secretária da Mesa (Sr.^a Lídia Norberta dos Santos Martins), Vice-Secretário do Mesa sira (Sr.^a Regina Freitas no Sr. António Nobre Amaral Tilman), Sr. Deputado no Sr.^a Deputada sira, Ministro dos Assuntos Parlamentares e Comunicação Social (Sr. Francisco Martins da Costa Pereira Jerónimo), Ministro dos Transportes e Comunicações (Sr. José Agostinho da Silva), Secretário de Estado do Ambiente (Sr. Demétrio do Amaral de Carvalho), família enlutada, funcionário Secretariado-Geral

Parlamento nian no assistente sira hodi simu procissão ne'e.

Depois, hotu-hotu hamriik hodi halo minuto de silêncio no tuir kedas ho execução ba hino nacional «Pátria».

Sr. Presidente loka sessão solene iha tuku 10 liu minuto 33 dadeer no fó biban ba Deputado no Deputada representante sira hussi Bancada Parlamentar FRETILIN, CNRT, PLP, KHUNTO, PD, UDT, FRENTI-MUDANÇA no PUDD hodi hato'o sira-nia declaração relaciona ho memória luta ba libertação nian ne'ebé Sr. Sabino Soares «GUNTUR» hussik hela no mós sentidas condolências kle'an ba matebian ne'ebé fila ona ba Na'i nia Kadunan Santo no mós ba família enlutada.

Tuir kedas Sr. Presidente ho membro Mesa sira, Sr. Deputado no Sr.ª Deputada sira, Sr. Secretário-Geral no Sr. Secretário-Geral Adjunto Secretariado Parlamento Nacional nian hakat ba Sala klaran ne'ebé urna Sr.

Sabino Soares «GUNTUR» nian rai bá, hodi fó homenagem ikus no cumprimenta mós faluk, oan-kiak no família enlutada sira.

Ikusliu, procissão ne'ebé lori urna no fotografia Matebian nian hussik hela Sala Plenário iha tuku 11 liu minuto 21 dadeer.

Sr. Deputado no Sr.ª Deputada sira ne'ebé halo intervenção maka Noé da Silva Ximenes no Francisco de Vasconcelos (PLP), Olinda Guterres (KHUNTO), David Dias Ximenes (FRETILIN), Mariano Sabino Lopes (PD), Gabriela Alves (FRETILIN), Bendita Moniz Magno (CNRT), Abel Pires da Silva (PLP), António da Conceição (PD), Francisco David Xavier Carlos (UDT), Isabel Maria B. Freitas Ximenes (FRENTI-MUDANÇA) no António de Sá Benevides (PUDD).

Sr. Presidente taka sessão plenária iha tuku 11 liu minuto 22 dadeer.

Sr. **Presidente** (Aniceto Longuinhos Guterres Lopes): – Vice-Presidente sira ho Secretário da Mesa do Parlamento, antes inicia ita-nia sessão solene atu fó homenagem ba colega Deputado «GUNTUR», ita aprova lai voto de pesar ne'ebé ninia texto parece iha hotu ona iha Distinto sira-nia Mesa.

Horas hatudu tuku 09 liu minuto 49 dadeer.

Tuir informação ne'ebé Mesa hetan katak mate-issin agora sai ona hussi sede Partido PLP, to'o ona residência matebian nian, depois atu mai liu iha Parlamento Nacional. Ita atrasa uitoan ita-nia sessão tanba ita hein.

Formulação voto de pesar ne'ebé texto agora iha tiha ona Ita-Boot sira-nia mesa, mas atu informa katak iha informação balu kona-ba Saudoso «GUNTUR» ninia participação iha Resistência foin tama iha minuto hirak liubá, e balu ne'ebé iha tiha ona iha texto ne'e seidauk completo, família hussu atu completa ho informação ne'ebé tama ikus ne'e, maibé tanba tempo orsida ita aprova hotu tiha mak bele completa di'ak liu tuir pedido família ho maluk sira hussi partido PLP nian. Ha'u fó kedas tempo ba Sr.^a Secretária Mesa atu halo leitura ba voto de pesar ne'ebé iha tiha ona.

Sr.^a Secretária Mesa, halo favor.

Sr.^a **Secretária da Mesa** (Lídia Norberta dos Santos Martins): – Obrigada, Sr. Presidente.

Bom dia ba Sr. Presidente, colegas composição Mesa no colega Deputado sira e maluk rona-na'in.

«Voto de Pesar n.º 2/2021 – De Pesar pelo falecimento do Deputado Sabino Soares “GUNTUR”.

Faleceu no passado dia 23 de janeiro de 2021, às 4h50 da manhã, no Hospital Nacional Guido Valadares, em Díli, o Deputado Sabino Soares “GUNTUR”. Tinha 45 anos de idade.

Sabino Soares nasceu em Lelalai, Posto Administrativo de Quelicai, Município de Baucau, a 8 de julho de 1975, filho de Luís Soares e Celestina Boavida Freitas.

Iniciou o seu envolvimento na luta pela libertação nacional em 1985, sendo o responsável principal para a juventude na Caixa Chegue Wari, no Suco Lelalai.

A partir de 1 de abril de 1990, envolveu-se no grupo de jovens clandestino EGOLAI. Nesse mesmo ano, esteve também envolvido na organização clandestina “*Himpunan Pemuda Pelajar dan Mahasiswa Anti Integrasi.*” (HPPMAI).

Foi fundador do grupo Amor da Paz, juntamente com Jacob Freitas (Sakunar), o qual tinha como objetivo promover a comunicação com a frente clandestina em Baucau.

Em 1993 assumiu o cargo de coordenador-geral da organização Loriku Asuwa'in na sub-região II de Baucau. No início desse ano, juntamente com os seus irmãos, fundou a organização LIJUMA (Liga Juventude de Matebian).

A partir de julho de 1993 envolveu-se ativamente na Organização OPJLATIL (Organização Juventude Loriku Asuwa'in Timor-Leste) e foi coordenador desta na sub-região norte de Baucau.

Em 1995 e 1996 foi responsável pela organização de manifestações contra as forças militares indonésias. Foi capturado e acusado por agitação política, e esteve preso em Baucau durante 20 meses.

Em outubro de 1998, assumiu a coordenação de todas as organizações de juventude na sub-região norte de Baucau, com o objetivo de promover a participação dos jovens e dos seus familiares no referendo sobre a independência do país.

Entre 1999 e 2014 esteve envolvido na organização CPD-RDTL/FRETILIN. Foi membro do Comité Central da Fretilin (CCF), e assumiu o cargo de Vice-Direção da Juventude da FRETILIN da CPD/FRETILIN.

Em 2002 foi fundador da Escola Secundária 28 de Novembro, e foi professor até 2017. Entre 2015 e 2017 foi fundador do Partido da Libertação Popular e assumiu o cargo como Presidente e Vice-Presidente da Comissão Instaladora do Partido. Foi eleito Deputado do Parlamento Nacional pelo Partido PLP durante duas Legislaturas, a IV Legislatura entre 2017 e 2018, e a atual V Legislatura, 2018 a 2023, tendo desempenhado o cargo de Vice-Presidente da Comissão Especializada de Educação e Cidadania (Comissão G) até 2019. Foi Presidente interino da mesma Comissão durante seis meses em 2020.

Sabino Soares “GUNTUR” dedicou a sua vida à luta pela libertação do país, destacando-se todo o incansável trabalho que desenvolveu com os jovens, para que a juventude nunca deixasse de lutar pelo país e de acreditar na independência e na liberdade.

Na memória dos Deputados e funcionários parlamentares ficará para sempre a lembrança do seu espírito afável e da dignidade com que prestigiou o exercício do mandato parlamentar e o Parlamento Nacional.

Nesta hora de dor e de luto, o Parlamento Nacional expressa o seu pesar pelo falecimento do Deputado Sabino Soares “GUNTUR” e apresenta sentidas condolências à esposa Elizita Fátima de Jesus, aos filhos Selly Romance Guntur Soares, Salaguero Guntur Soares, Salaria Guntur Soares, Jemmore Ellymor Guntur Soares e Jé Guntur Kay Rala Ell Fátima Soares, à demais família enlutada, e ao Partido PLP.

Os Deputados proponentes: Deputado Cornélio Gama «L7», Deputado Mariano «Assanami» Sabino, Deputado Duarte Nunes, Deputado Francisco Miranda Branco, Deputado António Benevides e Deputado António Verdial de Sousa.».

Obrigada, Presidente.

Sr. Presidente : – Obrigado, Sr.^a Secretária Mesa.

Distintos Deputados, projeto Voto de Pesar mak ne’e, hanessian ohin ha’u adianta tiha ona, informação kona-ba participação Deputado «GUNTUR» nian seidauk completo iha-ne’e, colegas e maluk Deputado sira ne’ebé hatene di’ak liu karik kona-ba distinto Deputado Saudoso «GUNTUR»... Mesa promete atu completa hotu informação sira-ne’e, depois de ita halo aprovação. Mas, tanba ita sei iha tempo, mate-issin seidauk tama iha recinto Parlamento, fó tempo ba distinto Deputado sira atu hato’o observação ou informação ruma atu completa di’ak liután projeto Voto de Pesar ne’ebé agora iha hela. Halo favor.

Sim: distinto Deputado Noé da Silva.

Sr. Noé da Silva Ximenes (PLP): – Obrigado ba Presidente Parlamento Nacional, bom dia ba Ita, bom dia mós ba Vices, Secretário no caros colegas Deputados no audiência sira hotu.

Sim, hanessian Presidente Parlamento Nacional fó sai ona katak iha descrição sira ne’ebé agora daudaun iha kona-ba Saudoso ninia participação iha passado seidauk completa. Portanto ha’u atu aumenta tan. A partir 1998 até 1999, nia hanessian mós coordenador juventude parte CNRT nian iha Baucau. Além de ne’e, nia mós sai hanessian membro ba Caixa Buka Liberdade a partir 1990 até 1999. Além de ne’e, nia mós hetan captura hussi Tim SAKA (*Satuan Khusus Pusaka*) altura iha Quelicai, que nia dala barak hetan captura iha parte ne’ebá, e hetan mós tortura lubuk ida iha tempo ne’ebá. Além de ne’e, nia mós sai hanessian coordenador Marcha da Paz iha Baucau a partir 1992 e 1993. Iha tempo ne’ebá iha movimento lubuk ida ne’ebé nia mak hanessian coordenador geral iha tempo ne’ebá. E hanessian mós membro caixa clandestina Buka Liberdade, nia mós halo ligação direta ho ita-nia Saudoso Daitula, tuir estafeta Saudoso «Samodok» nian.

Ha'u hanoin ida ne'e mak ha'u hakarak aumenta, e obrigado.

Sr. Presidente : – Obrigado, Sr. Deputado.

Distinto Deputado Vasconcelos.

Sr. Francisco de Vasconcelos (PLP): – Desculpa, Presidente, ohin ha'u fó-hatene ba sira iha oin para tau sira-nia naran.

Sr. Presidente : – Distinta Deputada Olinda Guterres.

Sr.ª Olinda Guterres (KHUNTO): – Bom dia ba Ita-Boot, bom dia ba Secretária da Mesa, Sr. Ministro, colegas Deputados ho maluk sira ne'ebé marca presença iha fatin ida-ne'e.

Sr. Presidente, ha'u hanoin ohin ida lê ne'e loos ona, e aumenta Senhor hussi PLP nian ne'e, ha'u mós rona tanba ha'u mós participa, ne'ebe di'ak loos mak ida-ne'e. La'ós orsida aumenta, aumenta, bele aumenta mós falso. Uluk nia serviço durante clandestina ne'e, ha'u mós hatene, maibé ha'u la ko'alia tan, maibé ida ne'ebé Sr. Noé ohin ko'alia ne'e loos ona. Ita-Boot lalika soe tan, soe tan, atu hussu para inventa hanessan horibainhirak ida seluk mai iha-ne'e, ha'u conta história horibainhirak mai iha-ne'e, inventa barak! Ne'ebe, buat processo ida-ne'e, labele halo invenção barabarak. Ida-ne'ebé mak loos ne'e, loos ona mak ida-ne'e. Sr. Presidente, desculpa, ha'u mós mai iha-ne'e, ha'u hatene! Ne'ebe, buat ne'ebé Sr. Noé ko'alia, ne'e loos ona, lalika soe tan mai iha-ne'e ona.

Obrigado, Sr. Presidente.

Sr. Presidente : – Obrigado, Sr.ª Deputada.

Informação ikus mak ne'e: ita hotu hatene iha participação Saudoso «GUNTUR» nian, é pena que nia rassik seidauk regista iha Comissão Homenagem. Ne'ebe, ita halo loos hotu informação kona-ba ninia participação, liuliu ba maluk sira ne'ebé hatene di'ak liu, orsida colabora ho técnico sira hussi DIPLIN ho Mesa Parlamento nian atu completa no hadi'a didi'ak Voto de Pesar ne'ebé contém participação Saudoso «GUNTUR» nian.

Distinto Deputado «Mandati».

Sr. David Dias Ximenes «Mandati» (FRETILIN): – Obrigado, Presidente.

Infelizmente ita lakon ema ida. Sabino «GUNTUR», ha'u conhece nia mós, la'ó duni. Nia hanessan mós ninia maluk jovem sira ne'ebé iha Díli ne'ebé sira loke fórum barabarak atu contra

duni Indonésia nina presença ho nina lacaio sira. Ita labele nega, hussi Díli to'o Baucau, iha vila barabarak, ita sempre iha jovem sira ne'ebé notórios ou salientados ne'ebé fó sira-nia participação e ao mesmo tempo dinamiza resistência clandestina hussi Timor, a partir de Lospalos to'o Jacarta.

Ohin loron ita ko'alia kona-ba Região I, Região II, Região III, Região IV ho tan Região V, ha'u la dehan katak ha'u maka naran sá, mas por azar e por sorte, organização sira-ne'e submete ba Frente Clandestina. E ema barak iha-ne'e hatene, ohin loron democracia halo às vezes ita lufulafu malu, ko'alia malu, mas organização clandestina sei conhece sé mak sé. E Sabino «GUNTUR» labele sai hussi círculo be Frente Clandestina juventude nian ne'ebé norteio tebes. Ita bele dehan katak labarik sira momento ne'ebá dehan katak lakohi duni, dehan de'it lakohi. Ita convence sira atu muda sira-nia determinação, dehan katak tem que lori ho disciplina, sira lakohi. Sira dehan: «Maka ne'e ona, mate mós ami hakarak mate, moris mós ami tem que moris tuir ami-nia aspiração nu'udar nacionalista ou patriota Timor-Leste nian.».

Ha'u-nian mak ne'e: ha'u conhece nia, ha'u labele dehan fali katak sira-ne'e la... Ida-ne'e ha'u hakru'uk, katak sira mak herói duni, sira mak alfa ho ómega ba ita-nia funu ne'e, lori juventude ou jovem sira nia participação a partir de Tutuala, Jacarta ho Bandung. Sira mak ne'e, ohin loron ita tem que honra sira.

Muito obrigado, Presidente.

Sr. Presidente: – Obrigado, distinto Deputado.

Sirene nia lian fó sinal katak mate-issin atu tama daudauk ona iha recinto Parlamento Nacional. Dala ida tan, orsida Voto de Pesar ne'e sei completa mós ho informação hussi família no maluk Deputados ho sira seluk ne'ebé iha informação barak kona-ba participação Saudoso «GUNTUR» nian.

Nune'e ita prepara ba vota atu aprova Voto de Pesar ida-ne'e. Distintos Deputados vota a favor, contra, abstenção.

Obrigado.

Resultado votação: a favor 64, contra 0, abstenção 0. Voto de Pesar ba falecimento Deputado Sabino «GUNTUR» aprovado.

Mossu protesto hussi Deputado sira relaciona ho falha técnica ba contagem no resultado voto.

Sr. José Virgílio R. Ferreira (CNRT): – Ba Mesa 65.

Lian hussi Deputada balu dehan katak Deputada Carmelita la vota.

Sr. Presidente: –Técnico sira mak sura, mas Deputado balu la iha.

Distintos Deputados, tanba ita halo contagem sala, ita halo fali votação ba confirmação de votos.

Votação ba confirmação de votos: distintos Deputados, vota a favor, contra e abstenção.

Obrigado. Resultado votação ba confirmação de voto: a favor 60, contra 0 no abstenção 0. Voto de Pesar aprovado.

Ponto de ordem: distinto Deputado «Mandati».

Sr. David Dias Ximenes «Mandati» (FRETILIN): – Obrigado, Presidente.

Ohin Ita-Boot temi, dehan katak nia la regista, mas ha'u-nia hanoin, hanessan Maun Boot Ramos Horta nia inan mós regista última da hora quando mate tiha ona, ita bele loke tan fali exceção ida-ne'e, porque ha'u la concorda, tan de'it la regista, nia labele bá Jardim dos Heróis! Porque ita conhece nia. Karik ita considera dehan katak frente ne'e, frente tolu: Frente Armada, Frente Diplomática ho Frente Clandestina; ha'u conhece nia, nia halo! Porque Maun Boot Ramos Horta ninia inan mós regista última da hora, mate tiha ona mak regista atu lori ba ne'ebá. Ne'e favor boot ida, karik bele, Presidente usa ninia influência ida-ne'e, ne'e la'ós de'it ha'u mak hatene, Falur Rate Laek mós hatene, ne'ebe ita bele halo ida-ne'e ka lae.

Ne'e últimos momentos ne'ebé ita halo ba ita-nia maluk sira, jovem sira be uluk dehan katak determinantes. Balu mak ohin loron halo parte iha-ne'e, Abono sai ba li'ur, Marito Mota iha-ne'e, «Assanami» iha-ne'e, António iha-ne'e, barak sei iha-ne'e, sira ne'ebé book an maka sira-ne'e, pioneiros be iha Díli laran book an mak ne'e, ne'e bele karik...

Sr.ª Maria Angélica Rangel da Cruz dos Reis (FRETILIN): – Agora sira mane de'it mak halo, fetu sira la halo karik!

Sr. David Dias Ximenes (FRETILIN): – Feto hotu halo, mas ida be dehan katak...Hanessan ida-ne'e de'it, fetu mós halo, tan saida mak momento ne'e ha'u ta'uk lori fetu ba oin? Tan quando kaer, quando kaer, fetu terus liu ita mane, ne'e mak ha'u ta'uk! Saida maka Bapa halo ba fetu ne'e, ha'u

haree, ha'u hatene, ne'e mak ohin loron ha'u sei temi de'it maka mane. Karik imi hakarak dehan ha'u loke iha-ne'e, Bapa halo saida? Imi hakarak ha'u loke, ha'u ko'alia, halo moe ita hotu kedas.

Obrigado, Presidente, Sabino nian bele karik ita halo esforço ida-ne'e. Muito obrigado!

Sr. Presidente: – Obrigado, distintos Deputados.

Parece mate-issin atu to'o daudauk ona. Dala ida tan, ha'u hatene informação barak distinto Deputado sira atu expressa hanoin ruma kona-ba experiência hamutuk ho Saudoso «GUNTUR», tanba mate-issin to'o daudauk ona, ita halo intervalo ida.

Processo kona-ba registo nian, família hamutuk ho maluk Partido PLP nian la'o tiha ona desde sábado, facto ida katak seidauk iha registo. Haree iha experiência sira caso sira anterior nian ne'e, processo la'o hela, e ohin daudauk, ne'e informação ikus, Comissão Homenagem encaminha ona carta ida ba Presidente da República.

Nune'e ita hakotu iha-ne'e, intervalo ida lai, intervalo ne'e ita tuur e hein iha-ne'e de'it.

Então, hodi tama iha salão ne'e, distinto Deputado «Assanami». Ida de'it ona!

Sr. Mariano Sabino Lopes «Assanami» (PD): – Presidente, obrigado.

Tanba ne'e bá duni Presidente nia responsabilidade e ita hotu nia responsabilidade nu'udar Deputado. Iha líder resistência lubuk ida lakohi registo, la registo, la'ós dehan seidauk registo, lae! Ne'e responsabilidade moral balu ne'ebé ami iha para la registo. Se ami-nia membro sira seidauk registo, ami sira ne'ebé uluk lidera sira ba registo uluk? Tanba ho razão sira-ne'e maka Comité Homenagem ne'e nia serviço maka identifica líder sira, quadro sira ne'ebé envolve, la'ós ema tem que bá registo. Luta ida-ne'e la iha patrão ida, ita hotu oferece ba ita-nia rain e ita-nia responsabilidade remata ona, maibé reconhecimento Estado ne'e, ne'e tem que reconhecimento Estado duni. Ita iha Clandestina ne'e la'ós ema la conhece, la hatene liu, até ita balu iha rai leten, comandante maka lidera, hatene fó ordem, nu'ussá mak tem que bá registo? Lei ba registo, maibé responsabilidade liderança diferente, ita dalaruma sente ba registo ne'e, ita-nia membro seidauk registo, ita mak bá registo uluk... Maibé, ita-nia membro dalaruma bá simu ona medalha, mas líder ne'e Estado mak tem que hatene tanba ne'e mak iha Comité Homenagem. Tanba ne'e maka ha'u hanoin, companheiro, ita-nia camarada, ninia fatin tem que iha Jardim dos Heróis.

Obrigado.

Sr. **Presidente**:— Obrigado, distinto Deputado, observação di'ak. Hussi ha'u, hussi Mesa do Parlamento, aconselha, ita avança ho resolução ruma karik, prepara projeto de resolução kona-ba ida-ne'e. Ne'e facto, katak ema barak ne'ebé sobressai e halo serviço duni, até lidera organizações resistêcia nian, to'o agora seidauk halo registo. Só tanba de'it ida-idak la hola iniciativa atu regista, então Comissão Homenagem mós nonook tiha de'it, hein de'it. Pronto, então oinsá maka ita atu resolve ida-ne'e? Mesa nia conselho mak ne'e: prepara projeto de resolução ruma, ita avança ho resolução.

Obrigado, agora tama daudauk ona, distintos Deputados, ita halo pausa ida hodi hein mate-issin tama ona mai.

Obrigado.

Pausa ne'e la kleur de'it tanba urna hussi mate-issin Saudoso Sabino Soares «GUNTUR», ne'ebé acompanha hussi família enlutada no parente sira, hahú tama ona iha Sala Plenário. Nune'e, tuirmai hala'o kedas mós Sessão Solene hodi fó Homenagem ba Memória Saudoso Deputado Sabino Soares «GUNTUR», Deputado Parlamento Nacional nian ba V Legislatura.

Sr.^a **Mestra de Cerimónias** (Ezolina Lobo Mascarenhas Pinto): – Senhores e Senhoras, muito bom dia.

Dentro de instantes daremos início à Sessão Solene de Homenagem à Memória do Saudoso Sabino Soares «GUNTUR», Deputado ao Parlamento Nacional da V Legislatura.

Senhores Convidados e Ilustres Deputados, peço-vos que se levantem.

Está neste momento a chegar à Sala do Plenário do Parlamento Nacional, o féretro do Saudoso Sabino Soares «Guntur», Deputado ao Parlamento Nacional da V Legislatura.

Continuemos de pé para ouvirmos a execução do Hino Nacional da República Democrática de Timor-Leste e o Minuto de Silêncio dirigido por Sua Excelência o Presidente do Parlamento Nacional.

Sr. Presidente: – Convida distinto Deputado sira, funcionários, técnicos e assessores, família boot Parlamento Nacional nian, no ema hotu ne'ebé marca iha Uma-Fukun Parlamento Nacional ohin loron, mai ita hotu hakru'uk iha silêncio minuto ida hodi reza no fó honra no homenagem ba ita-nia maluk, colega, maun-alin, Saudoso Sabino Soares «GUNTUR», ne'ebé Na'i Maromak bolu ona, e ita reza atu Maromak fó fatin ba nia iha Maromak nia Kadunan Santo. Hakru'uk, fó honra no homenagem mós ba Herói sira hotu ne'ebé fó an ba mate ba libertação pátria no independência Timor-Leste.

Minuto ida hakmatek ita hahú.

Sr. Deputado sira no assistente tomak hamriik no hakru'uk hodi fó um minuto de silêncio ba Saudoso Sabino Soares «GUNTUR» no ba Herói sira.

Obrigado.

Tuirmai, execução ba hino nacional «Pátria».

Sr.^a Mestra de Cerimónias (Ezolina Lobo Mascarenhas Pinto): – Srs. Convidados e Ilustres Deputados, peço-vos para se sentarem.

Sr. Presidente: – Ha'u declara aberta Sessão Solene de Homenagem à Memória do Saudoso Sabino Soares «GUNTUR», Deputado ao Parlamento Nacional da V Legislatura.

Horas hatudu tuku 10 liu minuto 33 dadeer.

Fó kedas tempo ba Sr.^a Secretária da Mesa do Parlamento Nacional atu halo leitura ba Voto de Pesar à Memória do Saudoso Sabino Soares «GUNTUR», Deputado da V Legislatura.

Tem a palavra, Sr.^a Secretária da Mesa.

Sr.^a **Secretária da Mesa** (Lídia Norberta dos Santos Martins): – Obrigada, Sr. Presidente.

«Voto de Pesar n.º 2/2021 – De Pesar pelo falecimento do Deputado Sabino Soares “GUNTUR”.

Faleceu no passado dia 23 de janeiro de 2021, às 4h50 da manhã, no Hospital Nacional Guido Valadares, em Díli, o Deputado Sabino Soares “GUNTUR”. Tinha 45 anos de idade.

Sabino Soares nasceu em Lelalai, Posto Administrativo de Quelicai, Município de Baucau, a 8 de julho de 1975, filho de Luís Soares e Celestina Boavida Freitas.

Iniciou o seu envolvimento na luta pela libertação nacional em 1985, sendo o responsável principal para a juventude na Caixa Chegue Wari, no Suco Lelalai.

A partir de 1 de abril de 1990, envolveu-se no grupo de jovens clandestino EGOLAI. Nesse mesmo ano, esteve também envolvido na organização clandestina “*Himpunan Pemuda Pelajar dan Mahasiswa Anti Integrasi*” (HPPMAI).

Foi fundador do grupo o Amor da Paz, juntamente com Jacob Freitas «Sakunar», o qual tinha como objetivo promover a comunicação com a frente clandestina em Baucau.

Em 1993 assumiu o cargo de coordenador geral da organização da Loriku Asuwa’in na sub-região II de Baucau. No início desse ano, juntamente com os seus irmãos, fundou a organização LIJUMA (Liga Juventude de Matebian).

A partir de julho de 1993 envolveu-se ativamente na Organização OPJLATIL (Organização Juventude Loriku Asuwa’in Timor-Leste) e foi coordenador desta na sub-região norte de Baucau.

Em 1995 e 1996 foi responsável pela organização de manifestações contra as forças militares indonésias. Foi capturado e acusado por agitação política, e esteve preso em Baucau durante 20 meses.

Em outubro de 1998, assumiu a coordenação de todas as organizações de juventude na sub-região norte de Baucau, com o objetivo de promover a participação dos jovens e dos seus familiares no referendo sobre a independência do país.

Entre 1999 e 2014 esteve envolvido na organização CPD-RDTL/FRETILIN. Foi membro do Comité Central da Fretilin (CCF), e assumiu o cargo de Vice-Direção da Juventude da FRETILIN da CPD-RDTL/FRETILIN.

Em 2002 foi fundador da Escola Secundária 28 de Novembro, e foi professor até 2017.

Entre 2015 e 2017 foi fundador do Partido Libertação Popular e assumiu o cargo como Presidente e Vice-Presidente da Comissão Instaladora do Partido.

Foi eleito Deputado do Parlamento Nacional pelo Partido PLP durante duas Legislaturas, a IV Legislatura, entre 2017 e 2018, e a atual V Legislatura, 2018 a 2023, tendo desempenhado o cargo de Vice-Presidente da Comissão Especializada de Educação e Cidadania (Comissão G) até 2019. Foi Presidente interino da mesma Comissão durante seis meses em 2020.

Sabino Soares “GUNTUR” dedicou a sua vida à luta pela libertação do país, destacando-se todo o incansável trabalho que desenvolveu com os jovens, para que a juventude nunca deixasse de lutar pelo país e de acreditar na independência e na liberdade.

Na memória dos Deputados e funcionários parlamentares ficará para sempre a lembrança do seu espírito afável e da dignidade com que prestigiou o exercício do mandato parlamentar e o Parlamento Nacional.

Nesta hora de dor e de luto, o Parlamento Nacional expressa o seu pesar pelo falecimento do Deputado Sabino Soares “GUNTUR” e apresenta sentidas condolências à esposa Elizita Fátima de Jesus, aos filhos Selly Romance Guntur Soares, Salaguero Guntur Soares, Salaria Guntur Soares, Jemmore Ellymor Guntur Soares e Jé Guntur Kay Rala Ell Fátima Soares e à demais família enlutada, e ao Partido PLP.».

Obrigada, Sr. Presidente.

Sr. **Presidente**: – Obrigado, Sr.^a Secretária Mesa do Parlamento Nacional.

Tuirmai, fô kedas liafuan ba bancadas parlamentares, hahú ho Bancada FRETILIN.

Sr.^a **Gabriela Alves** (FRETILIN): – Obrigado, Presidente.

Ex.^a Sr. Presidente do Parlamento Nacional, componentes da Mesa, Ex.^a Sr. Ministro dos Assuntos Parlamentares e Comunicação Social, distintas e distintos Deputados, Ex.^a Biberes no Mauberes no família boot, oan-kiak no feto-faluk Sabino «GUNTUR» nian.

Ohin ita hamutuk iha Uma-Fukun Parlamento Nacional hodi presta homenagem ikus ba Deputado Sabino Soares «GUNTUR», Juventude ida barani entre jovem Loriku Asuwa’in barak durante tempo ocupação Indonésia, ne’ebé la fô ulun ba integração *Timor-Timur* iha Indonésia.

Hanoin no hakarak ba independência no libertação rain no povo doben Timor-Leste, Saudoso Sabino Soares «GUNTUR» hatudu iha nia moris nu'udar jovem iha vila laran, halibur hamutuk ho jovem barak, barani hassoru militar Indonésia hodi participa iha demonstração oin-oin.

Bancada FRETILIN endereça ba família Saudoso Sabino Soares «GUNTUR», iha momento hanessan ne'e família uma laran mak sente lakon boot liu, tanba ida-ne'e ami hato'o ami-nia sentida solidariedade no sentidos votos de pesar ba família enlutada.

Hato'o mós sentidas condolências ba Partido PLP ne'ebé lakon ninia quadro ida, nu'udar Vice-Presidente Comissão Política Nacional no mós nu'udar Deputado iha Legislatura ida-ne'e. Parlamento Nacional lakon ninia membro ida tan: Gilman dos Santos, Albina Marçal Freitas, no agora Sabino Soares «Guntur».

Ohin Saudoso la hamutuk ona ho ita, maibé nia luta no contribuição hotu ba rain ida-ne'e sei mate iha história Timor-Leste nian.

Obrigado, Presidente.

Sr. **Presidente**: – Obrigado, Sr.^a Deputada.

Tuirmai: Bancada CNRT.

Sr.^a **Bendita Moniz Magno** (CNRT): – Obrigado.

Bom dia ba distinto Deputado sira hotu no mós ba família matebian.

Voto de pesar homenagem ba saudoso Sabino Soares «GUNTUR».

Saudoso Sabino Soares, ho código da resistência «GUNTUR», moris iha Quelicai, Baucau, dia 8 de julho de 1975, hakotu iis ho idade 46 anos iha Hospital Nacional Guido Valadares. Idade ne'e, ita hotu hatene, sei produtivo tebes atu contribui ba desenvolvimento política, social, democracia no educação iha ita-nia rain.

Saudoso «GUNTUR» hahú ninia carreira profissional nu'udar professor, hamutuk ho nia colega sira funda Escola Secundária 28 de Novembro, Becora, Díli. Depois, continua nia carreira iha vida política hodi nune'e consegue lori nia to'o iha Parlamento Nacional ida-ne'e. Foti decisão iha vida política, reflete momoos saudoso «GUNTUR» nia espírito de luta, atu contribui barak, liuliu ba política desenvolvimento Timor-Leste nian.

Tuir saudoso «GUNTUR», ne'ebé sempre fó hanoin iha Plenário ida-ne'e, atu político sira hotu halo política ho base sensível ba unidade, tanba alvo loloos ba desenvolvimento maka ema, nune'e maka política Estado tem que traça tuir interesse direito humano nian.

Hanessan ativista resistência Timor independente, professor no político, Saudoso «GUNTUR» halo ona nia papel lubuk ida nu'udar legado espírito da luta: dedicação, abnegação no determinação atu ita hotu tem que banati tuir, atu nune'e desenvolve ita hotu nia rain doben Timor Lorossa'e di'ak liután iha futuro.

Saudoso «GUNTUR» halo nia knaar nu'udar Deputado Parlamento Nacional hussi Partido Libertação Popular (PLP) iha loron 13 de junho de 2018, ba V Legislatura 2018-2023. Nu'udar Deputado, Saudoso «GUNTUR» halo ona mós nia papel lubuk ida iha Parlamento Nacional ida-ne'e.

Ohin ita hotu sente triste tanba lakon Deputado di'ak ida ne'ebé idealista no crítico iha ita-nia leet. Ho triste tebes no hori estrutura nacional no município sira, militantes no simpatizante tomak Partido CNRT nian, liuhossi Bancada CNRT, hato'o sentidas profundas condolências ba faluk no oan-kiak no mós ba família Partido PLP no colegas Saudoso «GUNTUR» nian. Ita hotu harohan ba Na'i Maromak atu simu Saudoso nia klamar iha Reino Lalehan.

Adeus companheiro da luta, adeus, adeus!

Sr. **Presidente**: – Obrigado, Senhora representante Bancada CNRT.

Tuirmai: intervenção Bancada PLP.

Sr. **Abel Pires da Silva** (PLP): – Obrigado wa'in, Sr. Presidente. Ha'u-nia respeito ba Ita-Boot, composição Mesa tomak, ha'u-nia respeito ba colega Deputado sira hotu, ha'u-nia respeito ba Saudoso nia kaben, família tomak no nia oan sira, no mós ha'u-nia respeito ba povo doben Timor-Leste.

Gunakan Tenaga untuk Rakyat, dedica ó nia esforço ba povo. «GUNTUR», naran resistência completo «Guntur Matebian Timur».

Sr. Deputado ne'e hamonu matan-been.

Sr. Presidente, ohin loron triste, la'ós de'it tanba família lakon sira-nia ai-riin ida, la'ós de'it tanba Sr.^a tanba Elizita lakon nia kaben doben ida, la'ós de'it tanba oan-kiak na'in-lima, Selly, Salaguero, Salaria, Jemmore, Jé Guntur, lakon sira-nia aman ida, la'ós mós tanba família boot Lelalai ho

Quelicaí lakon oan mane ida ne'ebé sira dedica ona ba Estado, la'ós de'it mós tanba organização resistêncía sira lakon manu-aman ida, la'ós de'it mós tanba família PLP lakon belun boot ida ne'ebé dedica nia energia tomak hodi harii no instala partido ida-ne'e iha território laran tomak, maibé ohin loron triste tanba liuliu Timor-Leste lakon herói ida, lakon Juventude Loriku Asuwa'in ida ne'ebé ho aten barani dedica nia an tomak contra presença ocupação iha rain ida-ne'e.

La iha liafuan ida mak atubele expressa ita-nia lakon, seluk hussi: hakmatek rohan laek iha reino lalehan, belun di'ak, camarada no companheiro de Luta, Ita-Boot nia naran *Gunakan Tenaga untuk Rakyat* sei continua sai nu'udar matan-dalan mai ami hotu atu dedica ami-nia energia tomak ba luta naruk libertação povo hussi kiak no mokit.

Atu taka, Sr. Presidente, lori PLP nian naran, ho haraik an ami hussu desculpa, karik durante Saudoso nia moris hala'o knaar, iha liafuan ka hahalok ruma la monu ba maluk sira-nia laran.

Obrigado barak.

Sr. **Presidente**: – Obrigado, Sr. Deputado representante Bancada PLP.

Tuirmai: representante Bancada KHUNTO.

Sr.^a **Olinda Guterres** (KHUNTO): – S. Ex.^a Sr. Presidente do Parlamento Nacional no Vices, Secretária da Mesa, Sr. Ministro, colegas Deputados, família matebian ne'ebé concentra hamutuk iha fatin ida-ne'e, ha'u-nia hakohak boot ba Ita-Boot sira no ha'u-nia sentidos pêsames ba Ita-Boot sira.

Ho tristeza boot mak horibainrua, iha 23 de janeiro de 2021, ita hotu simu conhecimento kona-ba ita-nia estimado colega Sr. Saudoso Deputado Sabino Soares «GUNTUR» nia falecimento.

Saudoso Deputado «GUNTUR» la'ós apenas colega ida ba ha'u, maibé nia ha'u-nia kaben nia sobrinho rassik, ne'e duni nia nu'udar ha'u-nia membro da família.

Sr.^a Deputada ne'e tanis.

Em nome Bancada do Partido KHUNTO, ha'u hato'o ami-nia profundas condolências ba Saudoso Deputado «GUNTUR» nia família no mós ba membros no militante tomak hussi Partido PLP iha momento difícil ida-ne'e.

Ha'u hakarak fó-hatene nia família rassik katak Parlamento Nacional mós tanis hamutuk ho imi no celebra ema notável ne'e nia vida extraordinária ne'ebé nia dedica ba ita-nia rain nia libertação no mós ba ita-nia povo nia futuro.

Ita-nia colega sira sei lembra Saudoso Deputado «GUNTUR» nu'udar ema pensador ida, ema democrático ida no ema ida-ne'ebé lutador ba liberdade. No mós, ita sei lembra nia nu'udar ema político ida ne'ebé justo no imparcial, ne'ebé sempre expressa nia pensamento loloos, no sempre halo crítica liuhossi forma ida-ne'ebé construtiva sem hanoin aat no sem rai vingança ba nia oponentes.

Saudoso «GUNTUR» ema ida-ne'ebé digno no disciplinado. Durante nia tempo nu'udar Deputado PLP iha Parlamento, nia dedica an maka'as ba debates kona-ba jovem sira-nia educação no formação, direitos ba feto no labarik sira, direitos humanos, paz, democracia no reconciliação nacional.

Ha'u hussu ba VIII Governo no mós ba Parlamento Nacional atu ita hotu tau liman hamutuk hodi acompanha no ajuda Saudoso Deputado Matebian nia família durante ninia funeral no mós ba buat sira seluk ne'ebé família precisa durante tempo ida-ne'e ne'ebé triste no difícil tebes.

Ha'u remata ha'u-nia discurso homenagem ho respeito no sentidos pêsames ba Saudoso Deputado «GUNTUR» nia família tomak, Na'i Maromak acompanha no abençoa imi hotu.

Lori Partido KHUNTO no nia militante tomak nia naran, ha'u hato'o ami-nia agradecimento ba enorme contribuição ne'ebé Ita-Boot fó ba nação doben Timor-Leste. Agora, descansa bá, descansa em paz iha Lalehan, ha'u-nia colega, ha'u-nia belun di'ak, ha'u-nia sobrinho di'ak, ne'ebé ita-rua sempre look cigarro ruma ba malu, sempre hamutuk iha li'ur ne'ebá wainhira antes de plenária hahú.

Muitíssimo obrigado, Sr. Presidente.

Sr. **Presidente** : – Obrigado, Sr.^a Deputada.

Tuirmai: intervenção hussi representante Bancada PD.

Sr. **António da Conceição** (PD): – Ex.^a Sr. Presidente do Parlamento Nacional, ilustres Presidentes das Bancadas Parlamentares, em especial à Bancada PLP, família querida do Saudoso «GUNTUR», irmão defunto e companheiro Sabino «GUNTUR».

Em nome da Bancada do Partido Democrático, apresentamos as nossas profundas condolências à Bancada PLP pela perda do seu Deputado, companheiro e irmão Sabino Soares «GUNTUR».

Sabino «GUNTUR» foi um cidadão que soube assumir as suas responsabilidades pelo seu país, pela causa da independência. Participou e contribuiu incansavelmente pela nossa independência.

A Bancada PD curva e honra o teu sacrifício dado ao nosso país. A Bancada PD também lamenta esta perda deste nosso querido irmão, companheiro, amigo e Deputado. Também queremos hoje dar as nossas sentidas condolências à família que ele deixou. Solidarizamos convosco neste tempo de amargura e partilhamos as lágrimas que correm nestes rostos inocentes.

Adeus irmão, até à eternidade, descansa em paz na eternidade do Senhor.

Obrigado.

Sr. Presidente : – Obrigado, Sr. Deputado.

Tuirmai: intervenção hussi Bancada UDT.

Sr. Francisco David Xavier Carlos (UDT) : – Obrigado, Sr. Presidente.

Bom dia, Sr. Presidente, componente Mesa, distintos e distintas Deputados, e família boot «GUNTUR», ne'ebé agora enlutada.

«GUNTUR» nia infância, nia la goza, boot iha funu laran. Iha nia juventude, nia contribui barak ba iha resistênci ne'ebé sacrifica nia an tomak, tama cadeia, sai cadeia, e ema barak la halo ida-ne'e.

Orgulho nu'udar juventude Loriku Asuwa'in mós, hodi naran Bancada UDT, Direção Nacional União Democrática Timorense no militante iha território tomak, hakarak hato'o profundas e sentidas condolências ba família boot «GUNTUR», ne'ebé agora daudaun lakon ona ema ida. La'ós família de'it mak lakon, nu'udar geração Loriku Asuwa'in ida hanessan ha'u mós sente lakon boot. Iha tempo resistênci ami terus hamutuk, halo ligação tama to'o Baucau, Samalari: Saturnino, Abeto Espírito Santo «Fatuk Laran», ami hamutuk. Maibé, ohin loron, buat ne'ebé ami halo, ema barak la halo, ema barak la halo, ema barak goza, mas to'o agora ami la sura ami-nia kolen, ami pronto hametin ami-nia ain-tuban nafatin la'o ba oin.

Adeus, maun-alin «GUNTUR».

Obrigado.

Sr. **Presidente** : – Obrigado, Sr. Deputado.

Tuirmai: intervenção hussi Bancada FRENTE-MUDANÇA.

Sr.^a **Isabel Maria B. Freitas Ximenes** (FRENTE-MUDANÇA) : – Obrigado, Presidente.

Bom dia ba distintos Deputados, ha'u-nia hakohak boot ba família Deputado «GUNTUR», prima Elizita, família hussi Saudoso Deputado «GUNTUR», bom dia ba ita hotu.

Iha loron sábado, 23 de janeiro, ita hotu simu notícia triste no laran moras rona Deputado «GUNTUR» hakotu iis iha Hospital Guido Valadares. Ohin loron Timor Lorossa'e tau tan luto metan ida tanba lakon assuwa'in boot, herói e grande lutador iha participação ba luta libertação nacional, Saudoso Sabino Soares «GUNTUR».

Saudoso moris iha suco Lelalai, Posto Administrativo Quelicai, Município Baucau, iha loron 8 fulan julho 1975, oan-mane hussi Luís Soares e Celestina Boavida Freitas.

Saudoso fó nia an tomak ba luta da libertação da pátria hahú kedas hussi 1985. Saudoso participa ona iha luta ba resistência e ba libertação da pátria liuhossi nia participação nu'udar responsável principal ba juventude iha caixa Chegue Wari iha suco Lelalai.

Saudoso mós participa iha vários grupos juventude nian ne'ebé ho mehi hamutuk ho jovem assuwa'in Timor sira hodi luta ba libertação povo Timor-Leste.

Saudoso sempre hatudu nia mehi boot, dedicação, nia ulun moruk no nia an tomak hodi participa iha mehi povo Timor tomak nian ba sai nação livre hussi ocupação Indonésia.

Saudoso fó nia mehi aas liu quando nia participa iha luta ba libertação povo Timor-Leste hussi mukit no kiak nu'udar fundador ba Partido Libertação Popular (PLP). Mehi ne'ebé lori Saudoso mai eleito iha Parlamento Nacional iha IV no V Legislatura. Mehi ba liberta povo Timor-Leste hussi mukit no kiak ne'ebé Saudoso hatudu liuhossi nia intervenções iha Parlamento ne'ebé ita hotu sempre rona, intervenções ne'ebé nakonu ho construtivo, crítico maka'as, kro'at tebes, maibé nakonu ho domin ba povo Timor-Leste.

Ita hotu hussu ba Aman Maromak, atu nune'e bele hatudu dalan loloos ba Saudoso atubele bá moris hakmatek, paz no dame iha Maromak nia Kadunan Santo.

Lori Partido FRENTE-MUDANÇA, quadros, militantes no simpatizante tomak, hato'o ami-nia profundas e sentidas condolências ba família Saudoso Sabino Soares «GUNTUR». Dala ida tan, ita

hussu ba Aman Maromak atubele fó força no laran hakmatek ba kaben, prima Elizita, família Soares hussi Lelalai, no mós colega sira hotu e ba família boot Partido Libertação Popular.

Obrigado, Presidente.

Sr. **Presidente** : – Obrigado, Sr.^a Deputada.

Ikusliu; intervenção hussi Bancada PUDD.

Sr. **António de Sá Benevides** (PUDD) : – Muito obrigado, Sr. Presidente, ba oportunidade.

Respeito ba Ita-Boot, Sr. Presidente, membros da Mesa, respeito ba distintos Deputados e distinta Deputada sira hotu, respeito ba Sr. Ministro sira, Sr. Secretário de Estado ne'ebé marca presença iha-ne'e, respeito ba maluk sira hotu ne'ebé marca presença iha-ne'e, especialmente ha'u-nia respeito no hakohak boot ba família no parentes hussi maun Deputado «GUNTUR», no mós ba quadros e militantes Partido PLP.

Iha dadeer-saan ida-ne'e ita hotu halibur iha uma povo nian ida-ne'e ho laran triste atu presta ita-nia última homenagem ba maun Deputado «GUNTUR».

Maun Deputado «GUNTUR» ema hotu conhece hanessan ema resistênci ida. Hanessan ema resistênci, maun «GUNTUR» sempre demonstra nia espírito nacionalismo no patriotismo. Ato ida-ne'e, nia expressa iha Parlamento Nacional liuhossi nia intervenção política no técnica ne'ebé dala barak sempre nakonu ho linguagem crítico ho carácter revolucionário baseia ba lógica no pensamento crítico.

Infelizmente, hahú ohin, maun «GUNTUR», Ita-Boot nia intervenção ami sei la rona tan ona, maibé Ita-Boot nia princípio no Ita-Boot nia pensamento crítico sei sai memória inesquecível.

Ami fiar, ami Deputado ne'ebé horas-ne'e iha-ne'e no povo hirak ne'ebé hadomi Ita-Boot, liuliu jovem sira, sei banati tuir espírito de nacionalismo no patriotismo ne'ebé Ita-Boot hussik hela mai ami hotu.

Ami fiar katak horas-ne'e Ita-Boot sei hamutuk ho heróis no mártir sira seluk, no Deputado sira seluk ne'ebé fila uluk ona ba Aman Maromak, sei harohan rohan-laek mós mai ami atu ami continua halo ami ida-idak nia missão tuir Ita-Boot sira-nia mehi no, liuliu, tuir buat ne'ebé Maromak hakarak mai ami ida-idak atu halo.

Ikusliu, lori Bancada PUDD, liderança Partido no militantes Partido PUDD nian, hato' o ami-nia sentidas e profundas condolências ba família enlutada no família boot PLP.

Boa viagem, maun Deputado «GUNTUR», e descansa em paz.

Obrigado, Sr. Presidente.

Sr. **Presidente** : – Obrigado, Sr. Deputado.

Hussi Mesa do Parlamento Nacional, nu'udar Presidente do Parlamento no hodi ha'u-nia família nia naran, ha'u hakarak hato' o mós sentidas condolências no solidariedade tomak ba Saudoso «GUNTUR» nia kaben, nia oan sira no família enlutada tomak, nune'e mós ba Partido PLP ho nia estrutura no militante sira hotu ne'ebé lakon sira-nia quadro no militante di'ak ida.

Mesa Parlamento Nacional decide suspende atividade plenária hussi ne'e to' o loraik, loraik ida, ba ohin loraik, nu'udar sentido de luto ba Saudoso Deputado «GUNTUR» nia mate, e aban terça-feira mak Parlamento Nacional sei hahú hikis nia atividade plenária.

Nune'e, ha'u declara encerra Sessão Solene ba Homenagem à Memória do Saudoso Sabino Soares «GUNTUR».

Horas hatudu tuku 11 liu minuto 04 dadeer.

E ha'u fó hikis ba Protocolo Parlamento nian.

Sr.^a **Mestra de Cerimónias** (Ezolina Mascarenhas Lobo Pinto):— Em seguida, com todo o respeito, solicitamos a Sua Excelência o Presidente do Parlamento Nacional e aos Membros da Mesa e Deputados do Parlamento Nacional presentes para prestarem a última homenagem ao féretro.

Obrigada.

Sr. Presidente ho membro Mesa sira, Sr. Deputado no Sr.^a Deputada sira, Sr. Secretário-Geral no Sr. Secretário-Geral Adjunto Secretariado Parlamento Nacional nian hakat ba Sala klaran ne'ebé urna Sr. Sabino Soares «Guntur» nian rai bá, hodi fó homenagem ikus no cumprimenta mós faluk, oan-kiak no família enlutada sira.

Sr. Presidente taka sessão plenária iha tuku 11 liu minuto 22 dadeer.

DIVISÃO DE REDAÇÃO, AUDIOVISUAL, TRANSCRIÇÃO E DOCUMENTAÇÃO.